

's Määrli
vo de 8 Plaite Gaier



Fasnacht 1987



8 Plaite Gaier sinn gueti Frinde,
doo duet urpletzig aine kinde;
är haus zem Stocker jetz goo schaffe,
doo luuse sich joo alli Affe,
dert jobbt är jetz gratis, griegt kai Gäld,
jetz sinns nur no 7 uff däre Wält.



7 Plaite Gaier hogge im Joggeli,
dert schutte si wie alti Doddeli;
und aine vo ihne, s isch nit zem glaube,
losst sich vom FCB aifach raube;
dert jobbt är jetz gratis, griegt kai Gäld,
jetz sinns nur no 6 uff däre Wält.



6 Plaite Gaier voll Daadedrang
drifsch im Plaza Dingeldang;
dr aint, däa raschtet pletzig uss
und lauft uss em Zirggel aifach druss;
är blybi jetz doo und daas fir immer,
ihm gfalle soo vyl lääri Zimmer;
dert jobbt är jetz gratis, griegt kai Gäld,
jetz sinns nur no 5 uff däre Wält.


5 Plaite Gaier hänn konsterniert,
uff em Minschi demonstriert;
dr Striebel sait nai, dr Striebel sait joo,
doo kenntsch bygoscht e Kind bikoo.
Soone gaischtig banggrodde Maa,
duets aim Gaier schuurig aa,
und däa verschwindet wie dr Blitz,
nai, joo, nai - daas isch kai Witz.
Als Assistänt vom Striebel Bolle,
spiilt är nur e ganz glaini Rolle;
dert jobbt är jetz gratis, griegt kai Gäld,
jetz sinns nur no 4 uff däre Wält.





4 Platte Gaier gseesch wie Lyche
uff dr Kunschtli ummeschlyche;
mit Schrubedämpferli an de Schueh,
spile die dert blindi Kuech,
Daas Spil luegt sich dr Berek aa,
entdeggt derby sy Spitzemaa,
denn dää, woo kuum uff em Ys kaa stoo,
hett är sofort in d'Mannschaft gnoo;
dert jobbt är jetz gratis, griegt kai Gäld,
jetz sinns nur no 3 uff däre Wält.

3 Platte Gaier hänn egedlig welle,
am Fryttig Fisch uff e Disch aane stelle;
mit Angelruete sinn si an Rhy,
doch dää gseet dry wie roote Wy;
doo lyttet dr aint em Hermann aa,
«ebb är e Job als Winzer kenn haa?»
dert jobbt är jetz gratis, griegt kai Gäld,
jetz sinns nur no 2 uff däre Wält.



2 Platte Gaier bummle am Spalebärg
und sueche dert nach Käs vom Bärg;
pletzlig schlyecht sich ain derfoo,
ar haig schyns e Stell bim Willi bikoo;
dert jobbt är jetz gratis, griegt kai Gäld,
jetz hets nur no ain uff däre Wält.



1 Platte Gaier ganz verlosse,
hett drumm kurzerhand bischlosse:
soo well är nit wytters mache,
är fänd daas alles schuurig bache.
Am CMS-Fescht, persee
hesch dää Gaier demoo gsee,
s Gschäft vom Lääbe mache
und die andere Felache,
hänn daas gheert, sinn sofort koo,
«kenne Si daas denn verstoo?»
dert jobbe die jetz fir vyl Gäld,
und sinn wider 8 uff däre Wält.



Noochwort vom Määrli-Unggle:

Soo hänn die 8 Gaier sich wider gfunde
und hogge au die Fasnacht in de Spunte;
Am 6-i im Stöckli bim Apéro-Fescht
sinn si denn au die beschte Gescht.
Au uff der Route driffsch si aa
und wirsch kai Ruch voor dääne haa ...

SCHINEBLOOSER

WAGGIS